



**SAUNOAGA O LE TALA FA'ATATAU FA'AOPOOPO
MUAMUA O LE TUPE
2022/2023**

AFIOGA MULIPOLA ANAROSA ALE MOLIO'O

Minisita o Tupe

20 TESEMA 2022

**SAUNOAGA O LE TALA FA'ATATAU FA'AOPOOPO MUAMUA O LE TUPE MO LE
TAUSAGA FA'ALETUPE 2022/2023**

Lau Afioga ile Fofoga Fetalai ma Sui mamalu ole Palemene,

O le viiga ma le faamanu e fo'i pea ile Tama ile Lagi e ou le mana ma le malosi uma lava. Ia tumau pea lona faaneetaga nei e oo ile faavavau. E manatu ua faaopopo nei ni aso ua ae le tuua aso folau. Ua sina foi le galu ma ua ite fanuaalalo ina ua gase atu ata o malama i faiva ma tiute o lenei tausaga. Sa alofaiva iai si o tatou atunuu mai ona ao seia oo i ona iu. E le faigofie le tatou savaliga ile amata mai o lenei tausaga ile pipisi ole fa'amai, fesuisuia'i mai ole tau aemaise o le malaga a le maliu ma le oti i soo se itu ole tatou atunuu. E ui o lea o le aao laveai ole tatou Tama ile Lagi ua tatou aulia mai ai lenei taeao matagofie.

Lau Afioga ile Fofoga Fetalai,

Ou te tula'i atu ma le agaga fa'aaloalo, e avea ai a'u ma sui o le Malo e tu'uina atu i luma o le laulauafono a le Palemene o Samoa, lenei Tala Fa'atatau Fa'aopoopo Muamua o le Tupe mo le Tausaga Fa'aletupe o lo'o fa'agasolo nei 2022/2023.

I lo'u tula'i atu ai i totonu o lenei Maota e tu'uina atu le Tala Fa'atatau Autu o le Tupe 2022/2023 ile masina o Me 2022, o lo'o tapena si o tatou atunu'u e tatala atu ana tuā'oi fa'avaomalo ile lalolagi ile māe'a o le lua tausaga o fa'atinoina tapu ma sa ona o puipuiga ile ono oo mai o le fa'amai o le Koviti-19.

E ui ile tele o galuega na fa'atinoina e ofisa ma Matagaluega a le Malo auā le malu puipuia o si o tatou atunu'u, sa maitauina le sao mai o le Koviti-19 i o tatou laufanua ile masina o Fepuari 2022. E fa'afetaia ai pea auaunaga sa fa'atinoina e le Matagaluega o le Soifua Maloloina ma ana pa'aga, lea e oo mai ai i lenei taimi o lo'o maitauina lava le vaavaaia lelei o le tulaga i le pepesi ai o lenei fa'amai i totonu o si o tatou atunu'u.

O lenei ua tatou taunu'u mai ile afa o le tausaga fa'aletupe, ma ua tatou molimauina le faatainoina o le tele o faiga fa'avae sa fuafuaina e le Malo. E lē gata mo le tapenaina o le tatou atunu'u mo le toe tatalaina o tatou tuā'oi ile lalolagi, o

le fa'afoeina ma le mata'itūina lelei o le pepesi atu o le faamai o le Koviti-19. E tauala atu lea i le faaauauina o polokalame fa'alauiloa, o galuega soosoo tau'au ai ma nuu ma afioaga, faatasi ai ma le lagolagosua a le aufaigaluega a le Soifua Maloloina ma ana paaga, ma ia mautinoa le una'ia pea o auaunaga mo le tatou tamāo'aiga.

O le tausaga foi lenei 2022, o lo'o fa'ata'oto ai fuafuaga a le tatou Malo mo le fa'amanatuina o le 60 tausaga, talu ona tuto'atasi Samoa lea sa amatalia mai ile masina o Iuni 2022, ma e fa'amoemoe e fa'amāe'a ia Iuni 2023.

O le masina o Aukuso 2022 lea sa tatala aloa'ia ai tuā'oi fa'avaomalo a Samoa ile lalolagi, ma o le masina foi lea sa fa'amanatuina ai le 60 tausaga talu ona sainia le Feagaiga Fa'a-Uō ile va o Niu Sila ma Samoa. O le Afioga ile Tamaitai Palemia ia Jacinda Ardern ma lana aumalaga, o nisi na ulua'i taunu'u mai i laufanua o Samoa ina ua toe tatala femalagaa'iga.

E oo mai ile asō, o lo'o fa'aauau pea le fa'atinoina o faiga fa'avae ma auaunaga a le Malo, ina ia una'ia ai tagata tafafao maimoa mai fafo, auā le toe si'itia o le vaega ma'oti o turisi. E aofia ai le una'ia o galuega fa'alauiloa, toe fa'atinoina o le Teuila, aemaise ai le fa'amanatuina o le 60 tausaga o le tuto'atasi o le Malo o Samoa, lea o lo'o fa'aauau pea ile atunu'u atoa.

E lē gata i lea, sa fa'atinoina foi e le Malo o Samoa ni faiga fa'avae tau tupe, auā le si'itia o le soifuaga laulelei (Welfare) o tagatanu'u, ma le una'ia o le tamāo'aiga e aofia ai vaega nei:

- Fesoasoani mo Tagata e iai Aafiaga Tumau o le Soifua;
- Tu'uitiitia o Fa'amai Lē Pipisi;
- Taofia o le Sauaina o Tinā ma Tamaitai;
- Fesoasoani mo le Vaega Ma'oti o Turisi;
- Fesoasoani mo Pisinisi Laiti; ma
- Polokalame mo le Atina'ega o Itumalo.

Lau Afioga ile Fofoga Fetalai,

Talu mai Iuni 2022, ua tele suiga ua maitauina ile tamāo'aiga o le lalolagi, ma e ono lamatia ai le vaai mamao mo le toe fuata'ina o le tamāo'aiga o Samoa, aemaise ai le maitauina o le si'itia maua luga o le tau o le suauu ma mea taumafa ile lalolagi. O le taofi, afai e lē vave fa'atino e le Malo o Samoa ni faiga fa'avae fa'amāmā avega ile atunu'u, e ono aafia le vaai taula'i mo le fa'atupula'ia o le tamāo'aiga ile lumana'i.

O lenei mau ma le taofi, o lo'o avea ma fa'avae o lenei Tala Fa'atatau Fa'aopoopo Muamua o le Tupe, mo le tausaga fa'aletupe 2022/2023, e pei ona folasia i le laulauafono a le Maota i lenei taeao.

Lau Afioga ile Fofoga Fetalai,

O lo'o aafia i lenei Tala Fa'atatau Fa'aopoopo Muamua o le Tupe 2022/2023 ni faiga fa'avae e fesoasoani atu ai i tagatanu'u aemaise ē e aupito sili ona mā'ale'ale lo latou tamāo'aiga, auā le tali atu ai i aafiaga o le si'itia o le tau o le soifuaga, ma e aafia ai vaega nei:

1. \$50tala Fa'aopoopoina ile Penisione masani mo masina o Aperila, Me ma Iuni 2023.

O lenei fesoasoani o le a fa'amanuiaina ai uma tagata fai penisione e tusa lea ma le 11,320.

2. \$50tala Fa'aopoopoina ile Fesoasoani mo Tagata e iai Aafiaga Tumau o le Soifua mo masina o Aperila ma Me 2023.

E fa'amoemoe e fa'amatu'uina atu lenei fa'amāmā avega mo le to'a 2,017 o tagata o lo'o agavaa i lenei fesoasoani a le Malo.

3. O le aso 23 o Ianuari 2023 o lo'o fa'amoemoe e fa'amatu'uina atu ai le tului faapitoa e 2 pasene e le Fa'aputugā Tupe mo le Lumanai Manuia o Samoa poo le NPF.

O lenei fa'amāmā avega e tusa ma le 19 miliona tala, e fa'aopoopo atu i luga o fa'amanuiaga sa fa'atinoina i le amataga o Iulai ma Tesema 2022, ma o le a fa'amatu'uina atu atoa i le au fai saofaga.

E lē gata i lea, o le a fa'aauau pea ma si'itia galuega a le Malo, auā le mata'itūina lelei o tau o oloa aemaise mea taumafa i totonu o le atunu'u.

Lau Afioga ile Fofoga Fetalai,

O le Tala Fa'atatau Fa'aopoopo Muamua o le Tupe o lo'o tu'uina atu nei ile laulauāfono a le Palemene, sa tu'ufa'atasia e le Matagaluega o Tupe ma le vaai toto'a, i aafiaga o faiga fa'avae ile tamāo'aiga ma le soifuaga laulelei o le atunu'u, aemaise le nauta'iga ina ia pulea ma mata'itū lelei tupe a le tatou Malo. O lea sa fa'atinoina ai e le Matagaluega o Tupe se iloiloga, auā le taumafai e fetu'una'i ma toe fa'asoa ma fa'asafua nisi o vaegatupe fa'asao, ina ia lē aafia le fa'asiliga o tupe alu i tupe maua, auā le fa'atinoina o atina'e ua ave iai le fa'amuamua mo lenei tausaga fa'aletupe.

Lau Afioga ile Fofoga Fetalai,

O le aotelega o lenei Tala Fa'atatau Fa'aopoopo Muamua o le Tupe, e fa'amoemoe o le a tu'uititia ai le fa'asiliga o tupe alu i tupe maua ile 3.2 pasene, mai ile 3.5 pasene e pei ona iai ile Tala Fa'atatau Autu. O lenei tu'uititiga o lo'o atagia mai ai le fa'aauauina pea o galuega a le Malo, auā le mata'itūina lelei o le fa'aaogāina o tupe fa'atatauina, ina ia pulea lelei ma fa'asoasoa tatau.

Tala Fa'atatau Fa'aopoopo Muamua o le Tupe:

Lau Afioga i le Fofoga Fetalai,

O le a ou otona atu vaega tāua o lenei Tala Fa'atatau Fa'aopoopo Muamua o le Tupe 2022/2023.

O le aotelega o tupe alu fa'aopoopo o lo'o fa'atalosagaina e tusa ma le \$13,953,091 ma e fa'atupeina lea mai vaega nei:

- \$6,600,000 mai tupe maua fa'aopoopo;
- \$1,686,847 mai tupe fa'ameaalofa mai paaga, o lo'o fa'atupe sa'o ai poloketi mo atina'e;
- \$7,732,878 mai tupe fa'atatauina o le a toe fetu'una'i.

TUPE MAUA FA'APOPOO

O le aotelega o tupe maua fa'aopoopo i lalo o lenei Tala Fa'atatau Fa'aopoopo Muamua o le Tupe, e tusa ma le **\$6,600,000** ma o lo'o au'ili'iliina atu e fa'apea:

1. \$1,400,000 mai ile Matagaluega o Tupe.

O nei vaegatupe o tupe aoina mai i lafoga fa'apitoa mo le saogalemu lea o lo'o totogiina i luga o pasese mo femalagaa'iga i vaalele (Safety and Security Levy);

2. \$3,700,000 mai ile Matagaluega o Tiute ma Tupe Maua.

O nei vaegatupe o lafoga e afua mai i talosaga fa'aopoopo mai Matagaluega a le Malo;

3. \$1,500,000 mai ile Matagaluega mo Fa'alapotopotoga a le Malo.

O nei tupe maua mo le Malo o le si'itaga i tupe, sa fuafuaina e ono maua mai i fa'asiliga o tupe maua a fa'alapotopotoga po'o dividends. O lenei si'itaga e afua mai i iloiloga amata tau su'etusi mo nei Ofisa, e pei ona fautua mai ai le Matagaluega o Fa'alapotopotoga a le Malo.

Tupe Fa'ameaalofa mai Paaga Masani a le Malo.

E iai nisi o fesoasoani fa'ameaalofa mai paaga mo atina'e masani a le Malo, o lo'o fa'atupe ai polokalame ma poloketi laiti o lo'o fa'atinoina e Matagaluega ma Ofisa eseese. O le aofa'iga atoa o nei fesoasoani fa'ameaalofa e tusa ma le \$1,686,847.

TUPE FA'ATATAUINA UA FETU'UNA'I

O le aotelega o tupe sa fa'atatauina ile Tala Fa'atatau Autu o le Tupe 2022/2023, e fa'amoemoe o le a toe fetu'una'i e tusa ma le \$7,732,878, ma o lo'o au'ili'iliina atu e fa'apea:

1. \$100,000 mai ile Matagaluega o Feso'ota'iga ma Fa'amatalaga Fa'atekonolosi.

O nei vaegatupe o tupe ua mafai ona fa'asaoina mai ile lisiina o pou o lo'o fa'apipi'ina ai upega feso'ota'i a le Samoa National Broadband Highway;

2. \$7,244,645 mai ile Matagaluega o Tupe.

O nei vaegatupe ua mafai ona fa'asaoina mai ile toe fetu'una'iga ma le toe fa'atalanoaina o sao a le Malo i nisi o ana atina'e tetele, ma o le a ou au'ili'iliina atu:

- **\$150,000 mai ile sao a le Malo ile poloketi mo tane suauu.**

O nei tupe ua mafai ona fa'asaoina e tusa ai ma le fa'atinoina o lenei poloketi i le taimi nei, lea o lo'o faatupeina e le Faalapotopotoga o Atunuu o lo'o gaosiaina le Suāuu (OPEC);

- **\$100,000 mai ile sao a le Malo ile poloketi mo feso'ota'iga.**

E iai vaega ua fetu'una'i nei ile fa'atinoina o lenei poloketi, ma ua mafai ai ona fa'asaoina nei vaegatupe;

- **\$100,000 mai tupe fa'atatauina mo lafoga ile poloketi mo le toe fausiaina o le Maota o le Palemene.**

E iai vaega o lenei poloketi ua mafai ona toe fetu'una'i, ma ua fa'asaoina ai loa ma vaegatupe fa'atatauina mo le totogiina o lafoga, e patino i galuega i lalo o lenei poloketi;

- **\$50,000 mai le Atina'e o fela'ua'iga i luga o le Lauelele (Land Transport Sector Development).**

E iai nisi o galuega fa'atino auā le atina'ega o le vaega maoti mo fela'ua'iga ua fa'asee atu nei ile tausaga fa'aletupe fou 2023/2024 ma ua mafai ai ona fa'asaoina nei vaegatupe;

- **\$3,000,000 mo le poloketi o le fa’aleleia o le auala mai Apia e tau i Siumu (Central Cross Island Road).**

O nei foi tupe ua mafai ona fa’asaoina, ona o le fa’asee atu o nisi o galuega fa’atino ile tausaga fa’aletupe o lo’o loma nei;

- **\$150,000 mai ile sao a le Malo ile poloketi mo le fausiaina o le Ofisa o le Fono.**

Talu ai o lo’o fa’agasolo pea tauofoga mo lenei poloketi, o lo’o maitauina ai le ono fa’ato’a amata lelei o lenei galuega ile tausaga fa’aletupe o lo’o loma nei, ma ua mafai ai ona toe fetu’una’i nei tupe fa’atatauina;

- **\$3,300,000 mai ile sao a le Malo ile poloketi mo le atina’ega o le uafu i Matautu.**

O nei vaegatupe fa’asao, e patino i galuega mo le atina’ega o le uafu i Matautu, ma e iai tulaga ua aafia ai le fa’atinoga, ma alagatatau ai ona fa’asee atu ile tausaga fa’aletupe fou;

- **\$223,900 Saofaga a le Malo ile Faletupe mo Atina’e Tetele a Asia.**

Ua mae’a ona totogiina lenei saofaga a le Malo ile faletupe o le Asian Infrastructure Investment Bank, ma ua mafai ai ona fa’asao ma toe fetu’una’i lenei vaegatupe;

- **\$150,000 sao a le Malo ile poloketi mo le fausiaina o nisi o falea’oga fou a le Iunivesite Aoao o Samoa lea o lo’o fa’atupeina e le Malo o Iapani.**

Talu ai o lea fa’ato’a amata tauofoga mo lenei atina’e, o le maitau i lona fa’agasologa, e fa’ato’a mo’omia lenei vaegatupe ile tausaga fa’aletupe o lo’o loma nei;

- **\$20,745 mo le lisi ile Faletupe o Atina’e a Samoa.**

O lenei vaegatupe sa fa’atatauina mo le lisi o le ofisa o le Minisita Lagolago, lea ua si’itia atu ile Fale o le Malo (FMFMII), ma ua mafai ai ona toe fetu’una’i tupe fa’atatauina.

3. \$188,233 mai ile Matagaluega o Fa'amasinoga ma le Fa'afoeina o Tulaga tau Fa'amasinoga.

O nei vaegatupe ua mafai ona fa'asaoina mai i totogi o avanoa faigaluega na tuai ona fa'atumuina, ma ua auina mai e toe fetu'una'i auā talosaga fa'aopoopo a le Matagaluega.

4. \$200,000 mai ile Matagaluega o Puna'oa Fa'anatura ma le Siosiomaga.

O lenei vaegatupe sa fa'atatauina lea mo le vaavaaia ma le tausiana o le malae i Matagialalua (Friendship Park), lea ua fa'asee atu i lalo o le Pulega o Tagata Tafafao Maimoa mai Fafo, ma ua mafai ai loa ona toe fetu'una'i i talosga fa'aopoopo a le Matagaluega.

TUPE ALU FA'APOOPO

Lau Afioga ile Fofoga Fetalai,

E pei ona ou ta'ua muamua, o le aotelega o talosaga fa'aopoopo mo lenei Tala Fa'atatau Fa'aopoopo Muamua o le Tupe, e tusa ma le \$13,953,091, ma o le a ou au'ili'iliina atu:

Tupe Alu Fa'aletulafono:

O le a si'itia ile \$4,000,000 tupe fa'atatauina mo tupe alu fa'aletulafono. E \$2,000,000 ole a fa'aopoopoina mo Lafoga mo Tupe Maua toe Fa'aolaina atu, ma le \$2,000,000 mo Lafoga i luga o Oloa ma Auauanaga toe Fa'aolaina atu. O nei tupe fa'aopoopo, o lo'o fua lea i luga o talosaga ua taunu'u mai mo le iloiloga a le Matagaluega o Tiute ma Tupe Maua.

Polokalame o Tupe Alu a Matagaluega:

O le aotelega o talosaga fa'aopoopo mo Polokalame fa'atinoina e Matagaluega e tusa ma le \$8,266,244 ma e aofia ai vaega nei:

1. \$103,545 mo le Matagaluega o Pisinisi, Alamanuia ma Leipa.

O lenei vaegatupe e fa'atupe ai avanoa faigaluega fou, e aofia ai le tagata fa'aopoopo mo le Vaega o lo'o vaavaaia Galuega Fa'avaitaimi i Niu Sila,

fa'apea le avanoa fou mo le vaega e fa'afoeina polokalame mo tagata faigaluega i totonu o le Matagaluega;

2. \$100,000 mo le Matagaluega o Feso'ota'iga ma Fa'amatalaga Fa'atekonolosi.

O nei vaegatupe e fa'atupe ai nisi o fonotaga, o lo'o fuafulaina mo le auai atu ai o le Afioga ile Minisita ma le Pule Sili ile fa'aiuga o le tausaga fa'aletupe;

3. \$7,620,050 mo le Matagaluega o Tupe.

O nei vaegatupe o lo'o fa'atalosagaina mo galuega fa'aopoopo a le Matagaluega e aofai ai vaega nei:

- **\$150,000 mo le sueina o tusi mo poloketi.**

O lenei galuega fa'atino o se tasi lea o sao a le Malo i ana atina'e, ma ua amata nei ona fa'agasolo mo nisi o poloketi ua mae'a;

- **\$1,342,350 mo le si'itia o le saofaga a le Malo o Samoa mo atina'e a le Faletupe o Asia ma le Faletupe a le Lalolagi.**

O lenei saofaga fa'aopoopo, e si'itia ai le saofaga a Samoa ile Fa'alapotopotoga fa'apitoa a le Faletupe o le Lalolagi, ua ta'ua o le IFC;

- **\$1,000,000 mo le totogiina o tiute ma le \$2,000,000 mo le totogiina o lafoga VAGST, e patino i poloketi ma polokalame o fa'atupeina e paaga masani mo atina'e a le Malo.**

Mo le silafia e sui mamalu o le Palemene, o le sao lea a le Malo i le faatinoina o poloketi e faatupeina mai e tatou paaga masani mo atina'e, o le totogiina lea o tiute ma lafoga VAGST i luga o oloa auina mai i fafo;

- **\$1,000,000 mo le Pulega o Malae Vaalele.**

O lenei vaegatupe, o lo'o fa'amoemoe e fa'alelei ai masini ma meafaigaluega, auā le fa'afoeina o auunaga masani a le Pulega o Malae Vaalele (groundhandling services);

- **\$501,700 e fa'aopoopo ile fesoasoani a le Malo mo tagatanu'u e iai Aafiaga Tumau o le Soifua (Disability Benefits).**

O lenei vaegatupe, e lē gata e fa'atupe ai le fa'atupula'ia o tagatanu'u resitalaina mo lenei fesoasoani, ae e fa'amoemoe foi e fa'atupe ai se fa'aopoopoga e ta'i \$50tala mo masina e lua, e pei ona ta'ua muamua;

- **\$1,626,000 e fa'aopoopo ile Penisione mo Tagata Matutua.**

E pei foi ona ta'ua, o lenei vaegatupe o lo'o fa'amoemoe e fa'atupe ai se fa'aopoopoga e tai \$50tala mo masina e tolu, ile fa'aiuga o le tausaga fa'aletupe o lo'o fa'agasolo nei 2022/2023, mo penisione o tagata matutua, auā se fa'amāmā avega ile tau o le soifuaga.

4. \$100,000 mo le Matagaluega o le Va-i-Fafo ma Fefa'atauaiga.

O lenei vaegatupe, e fa'amoemoe e fa'atupe ai le auai atu o le Afioga ile Tamaitai Palemia ma le Pule Sili, i nisi o fonotaga fuafuaina mo le afa mulimuli o le tausaga fa'aletupe o lo'o fa'agasolo nei;

5. \$188,233 mo le Matagaluega o Fa'amasinoga ma le Fa'afoeina o Tulaga Tau Fa'amasinoga.

O lenei vaegatupe, o lo'o fa'atalosaga e fa'atauina ai se masini fa'atekonolosi (server), auā fa'amaumauga ma fesootaiga a le Matagaluega;

6. \$154,416 mo le Matagaluega o Punaoa Fa'anatura ma le Siosiomaga.

O nei tupe fa'atalosagaina, e mō avanoa faigaluega fou a le Matagaluega o lo'o mo'omia tele mo nisi o ana auaunaga, ma ua mǎe'a foi ona fa'amaonia e le Komisi mo Tagata Faigaluega a le Malo.

POLOKALAME FA'AOPOOPO MO ATINA'E

E \$1,686,847 le aofa'iga o ni polokalame fou fa'atupeina sa'o e paaga masani mo atina'e a le Malo o Samoa e patino lea i vaega ma'oti nei:

- \$234,900 mo le Vaega Ma'oti o Atina'e o Nu'u ma Alalafaga, ma le Soifuaga Lautele;
- \$87,772 mo le Vaega Ma'oti o Aoga;
- \$97,500 mo le Vaega Ma'oti o Tulafono ma Fa'amasinoga;

- \$192,554 mo le Vaega Ma'oti o Auaunaga a le Malo;
- \$478,391 mo le Vaega Ma'oti o Fa'ato'aga ma Faiga Faiva;
- \$135,322 mo le Vaega Ma'oti o Fefa'ataua'iga ma Alamanuia;
- \$460,408 mo le Vaega Ma'oti o Tupe.

TUPE FESOASOANI TU'USA'O MAI MO LE FA'ATUPEINA O LE TALA ILE TUPE

Lau Afioga ile Fofoga Fetalai,

O lo'o aofia foi i totonu o lenei Tala Fa'atatau Fa'aopoopo Muamua o le Tupe 2022/2023, se fa'aopoopoga i tupe tu'usa'o fa'ameaalofa mai i nisi o tatou paaga, auā le fa'atupeina lea o le Tala ile Tupe, po'o "Budget Support". E pei ona silafia o nei vaegatupe e fa'amatu'uina mai e a tatou paaga, pe a mae'a ona iloilo le fa'atinoina lelei o polokalame na folasia, ma malilie autasi ai le Malo o Samoa ma ana paaga masani mo atina'e, ma e fua foi i le mata'itūina ma le puleaina lelei o tupe a le Malo. O nei fesoasoani fa'aopoopo ua mafai ona fa'amatu'uina mai e fa'atinoina ai faiga fa'avae, e tali atu ai i le si'itia o le tau o le Soifuaga, aemaise ai le tu'uititia o le fa'asiliga o tupe alu, nai lo'o tupe maua i le tala o le tupe.

O le aofa'iga o nei fesoasoani tu'usa'o e **\$44,060,000**, ma o lo'o tu'uvaevaeina fa'apea:

1. **\$20,000,000 (lua sefulu miliona tala Ausetalia) mai ile Malo o Ausetalia e tusa lea ma le \$36,000,000 tala Samoa**, ma o lenei fesoasoani o lo'o fa'amatu'uina mai fa'ameaalofa;
2. **\$3,100,000 (tolu tesi ma le tasi miliona tala Amerika) mai ile Faletupe mo Atina'e a Asia, e tusa lea ma le \$8,060,000 tala Samoa**. O lenei fesoasoani tu'usa'o o le vaega mulimuli o le fesoasoani a le Faletupe mo Atina'e a Asia, sa fa'amaonia i le tausaga 2017 (i le taimi o lo'o agava'a Samoa i le lima sefulu pasene o tupe fa'ameaalofa, ma le lima sefulu pasene o tupe nōnō, mai le fa'aputugatupe a le Asian Development Fund), ma o le vaega o le tupe fa'ameaalofa o lea sa fa'amatu'uina mai ia Aperila 2020, e tali atu ai i le Koviti-19.

Upu Fa'aiu:

Lau Afioga i le Fofoga Fetalai ma le Mamalu o le Fono Aoao,

O le Tala Fa'atatau o le Tupe mo le tausaga fa'aletupe o lo'o fa'agasolo nei 2022/2023, sa tu'ufa'atasia ma o lo'o fa'atinoina ma le naunauta'iga, ina ia toe fatufatu ma fa'ama'ite ai le tamāo'aiga o si o tatou atunu'u, i lenei vaitau. O le a lagolago tele e le Tala Fa'atatau Fa'aopopo Muamua o le Tupe nei galuega fa'ama'ite, e tauala atu lea i le fa'avaeina o ni alafua e faatino, auā le tali atu i aafiaga ona o le fa'atupula'ia o le tau o le soifuaga.

Ou te fiafia e fa'ailoa atu, o lo'o sologa lelei pea le fa'atinoina o faiga fa'avae uma, e pei ona fuafuaina mo lenei tausaga fa'aletupe, ma o lo'o fa'amauiina foi le tulaga lelei o tupe a le Malo. O le a galulue so'oso'o tau'au le Matagaluega o Tupe ma ana paaga, ina ia ausia taunu'uga mo'omia, a'o lē i mae'a lenei tausaga.

Lau Afioga ile Fofoga Fetalai,

O lo'o mata'itū lelei foi e le Matagaluega o Tupe faatasi ai ma ana paaga o le vaega maoti o tupe, le fesuia'iga ile tamāo'aiga ole lalolagi, ina ia lava tapena le Malo e tali atu i ni tulaga e ono lamatia ai le toe fuata'ina o si o tatou tamāo'aiga. O nei galuega uma o lo'o atagia mai ai le nofo mataala o le Malo, auā le fa'amausalīina o le si'itia pea o le soifuaga laulelei o tagatanu'u uma o Samoa.

E fia fa'aleoina le agaga fa'afetai tele i tatou paaga masani mo atina'e, fa'alapotopotoga tuma'oti, vaega tuma'oti ma pisinisi, fa'atasi ai ma tatou nu'u ma afioaga, mo lā outou lagolagosua faifai pea i galuega fai a le tatou Malo, auā le taumafai ina ia siitia le auaunaga i le mamalu o le atunu'u.

E ao foi ona tatou patipatia le taumafaiga maoa'e na ausia e le tatou Toa Samoa i le Ipu o le Lalolagi o le Lakapi Liki sa faia i Lonetona, aemaise ai foi le siamupini ai o le Au Taitoafitu a Samoa i le ta'amilosaga i Aferika i Saute.

Lau Afioga i le Fofoga Fetalai, fa’apea Sui Usufono o le Palemene,

Avea foi lenei avanoa t̄āua e fai ai a’u ma Sui o le Malo, e momoli atu ai mo’omo’oga alofa ma fa’amanuiaga i lau Afioga i le Fofoga Fetalai, le mamalu o le Palemene nei, aemaise le tapua’iga a Samoa atoa, mo se Kerisimasi fiafia ma le saogālemū. Ia alofa mai pea lo tatou Tapa’au Sili ile Lagi, fale i ona Aao alofa si o tatou Atunu’u Pele, a’o tatou sauni atu ai e fa’afeiloa’i le pepe o le Kerisimasi. Ia fa’amanuia mai foi le Atua, ia molimoli atu lo outou Soifua auā se tausaga fou manuia ma le saogālēmū, mo tatou uma.

Soifua ma ia Manuia!